



Synfocity = 839

mail us at : mzsynfo@gmail.com; mizoramsynod@gmail.com - Phone - 2314648

May 5, 2022

- **KTP General Conference Vawi 59-na tan a ni dawn ta**
Mizorama Thalai Inkhawmpui lian ber Kristian Thalai Pawl (KTP) General Conference vawi 59-na, Diakkawn Field, Kolasib-a nghah chu zanin (May 5, 2022) atang hian tan a ni dawn ta. Conference hian May 8, 2022 (Pathianni) zan thleng a awng.
KTP General Conference vawi 59-na thupuih 'Tunlai thil awmzia' (Rom 13:11) tih hman a ni a, Speaker atan Revd Chuauthuama, Ramhlun Vengchhak a ni ang.
Vawiiin (May 5, 2022) hi palai thlen kim ni a ni a, zanah Palai Lawm Inkhawm neih a ni ang. Inkhawm hi CKTP Leader Rev. Vanlalmuanpuia Khiangte in a kaihruai ang a, Rev. Dr. K. Lallawmzuala, Executive Secretary i/c KTP-in kumpuan hawn leh kumpuan thupui hlanna a nei ang. Rev. Z.D. Lalmachhuana, Synod Secretary (Sr.) in Synod Choir Music Video hlanna hun a hmang ang a, Synod Moderator Rev. Dr. Vanlalngbaka Ralte in Pathian thuchah a sawi ang.
May 6, 2022 (Zirtawpni) chawhmaah Rawngbawlana Report Inkhawm neih a ni ang a, chawhnuah Fakna Inkhawm neih a ni thung ang. Zan Pathian Biak Inkhawmah Rev. Dr. K. Lallawmzuala, Executive Secretary i/c KTP-in Pathian thuchah a sawi ang a, inkhawm banah Fellowship a awng.
May 7, 2022 (Inrinni) zing dar 9:00-ah kum 2022-2024 chhunga Central KTP hruaitu thar thlan a ni ang a, hemi hnu hian Conference rorel inkhawm neih chhonzawm a ni ang. Tun tumah hian General Agenda 10 chhawpchuah a ni a, Agenda floor-a sawiho lova inhrihfhiah tur engemaw zat a awng baw. Kum 2022-2023 Central KTP Budget ruahmanna leh Bial Budget ruahmanna te pharh a ni baw ang. Rorel hlan hian chawhma lamah Multiplex Programme hman tur a ni a, Kolasib Diakkawn Kohhran Biak Inah 'Ram leh hnam siamthat kawnga thalaite mawhphurhna' tih thupui hmangin Rev. V.L. Luaia Hranleh, Executive Secretary, Mizoram Synod-in thuchah a sawi ang a, Kolasib New Diakkawn Kohhran Biak Inah 'Kristian Thalai - Chhungkuaah' tih thupui hmangin Upa R. Lalmingthanga, Republic Vengthlangin thuchah a sawi ang a, Kolasib Venglai Kohhran Biak Inah 'Nupui Pasal Inneih' tih thupui hmangin Upa Prof. H. Lalthanzara, Nursery Vengin thuchah a sawi thung ang. Chawhnuah Variety Programme neih a ni ang a, Variety Programme-ah hian zai lam chi te, group recitation, lemchan leh faklam ti tur 11 lai ruat an ni.
Zan inkhawm atangin Conference thupui ngaihtlak tan a ni ang a, Revd Chuauthuama hnen atangin Pathian thuchah ngaihtlak a ni ang. Inkhawm banah Fellowship neih leh a ni ang.
May 8, 2022 (Pathianni) chawhma leh chawhnuah Speaker hnen atangin Conference thupui ngaihtlak a ni leh ang a, zan inkhawmah Synod Moderator Rev. Dr. Vanlalngbaka Ralte-in kum 2022 - 2024 CKTP hruaitu thar hlanna hun a hmang ang a, CKTP Leader kal chhuak Rev. Vanlalmuanpuia Khiangte-in Pathian thuchah a sawi ang. Inkhawm apiangin zaipawl 6 - 7 zai tura beisei an ni.
KTP General Conference video coverage buaipuitu tur Synod Information & Publicity (Synfo) thawktuten May 3, 2022 (Thawhlejni) khan Kolasib hi an thleng tawh a, **Hruaina Eng Channel (LPS Channel 123-ah & ZONET Channel 12-ah)** LIVE a pekchhuah tum a ni.
- **PCI General Assembly tuang taka neih a ni**
Presbyterian Church of India (PCI) General Assembly vawi 44-na chu April 28 - May 1, 2022 chhung khan Umroi, Meghalaya-ah neih niin Ri Bhoi Synod-in an thleng. Kumina an thupui chu "Rinawmin awm rawh" (Thup 2:10) tih a ni. Assembly-ah hian palai 521 an kal a, Mizoram Synod atangin Palai 135 an kal a ni.
Puipate :
Moderator : Rev. B.B. Lamin
Moderator Elect : Rev. Khamchinkhaia
Secretary (Sr.) : Rev. Dr. K. Lallawmzuala
Secretary (Jr.) : Rev. J.R. Thabah
Treasurer : Rev. H.L. Myrsingh
Statistician : Rev. Arjones Phangcho
April 28, 2022 khan PCI Committee pahnih - Executive Committee leh Nomination Committee an thu a, April 29 & 30, 2022 chhun lamah Rorel inkhawm neiin PCI Staff Service Rules ennawn a ni a, engemaw zat siam danglam a ni. PCI General Assembly kum 100-na chu kum 2026-ah lawm ni se, PCI

Executive Committee-in a tul anga lo bawhzui tura rel a ni. PCI Dan Bu ennawn a ni a. PCI Executive Committee-in a ruahman sa chu pharh a ni a, a tlangpuiin pawm a ni a. Hman nghal tura lo zut mam turin PCI Executive Committee kutah dah a ni. Thurin VII-na Thlarau Thianghlim chuan Khawngaihna hna a thawhin thu tih dawtah Hlate tih belh a ni. Synod Inkhawmpuia Presbytery atanga dan zawh kim 400 aiawha palai pakhat kan intirh thin chu dan zawh kim 500 aiawha palai pakhat intirh tawh tur a ni. Administrative Secretary 2022 - 2025 atan Rev. Sawitinkai Vaiphei, Manipur Synod thlan a ni. Synod Pastoral Committee member, Presbytery atanga mi 3 kan ruat thin chu 2 ruat thin tawh tura rel a ni. KJP Synod Mihngi chhunga Presbytery 6 huama Paleng Synod (Provisional Synod) piantir tura PCI Executive Committee rawtna chu pawm a ni. Mizoram Synod hnuaiia Manipur Area chu Provisional Synod tura pawm a ni a, a hming atan Tangphai Synod tih a ni ang a, a tul apiang chu PCI Executive Committee bawhzui tura dah a ni. Rev. L.D. Nongsiej, Administrative Secretary tanglai chu term laklawha thlak a ngaih avangin 2022 - 2023 atan Rev. B.R. Kharnaor, KJP Synod Sepngi chu rawt a nih angin pawm a ni. PCI Executive Committee-in Co-ordinator neih a rawt chu an rawt ang hian pawm a ni a, a tul angin PCI Executive Committee-in bawhzui tura rel a ni. Mizoram Synod atanga thu lut mahni intihlum vui dan tur chungchang chu hetiang hian rel a ni :

- i) Tupawh mahni intihlum te chu vui dan pangngaia vui tur a ni.
- ii) Minister leh Kohhran Upa mahni intihlum chu Biak Inah vui loh tur a ni.

Dr. Lalthansangi Fanai, Presbyterian Women Fellowship (PWF) hruaitu tanglai (Central Kohhran Hmeichhe Asst. Secretary) chu kum 2023 - 2025 chhunga PWF Chairperson atana ruat a ni. PCI General Assembly wawi 44-na ah hian Pastor 46 sun an ni. PCI hnuaiia Synod 11 atangin Secretary-te report chu pawm a ni.

PCI General Assembly hi kum khat dana neih thin a ni a. Kum 2004-ah Dawrpui Kohhran (Aizawl)-ah leh kum 2012-ah Champhai Vengsang Kohhranah te nghah a lo ni tawh a. 45th PCI General Assembly chu May 2 - 5, 2024-ah Mizoram Synod-in an thleng ang.

☐ **Synod Prison Ministry**

Synod Prison Ministry chuan Aizawl khawpui pawna Mizoram District Jail pasarih (7) : Champhai, Kolasib, Mamit, Lawngtlai, Lunglei, Serchhip leh Siaha District Jail te a hmunah tlawha, an din hmunte zirchianga tlawh runpui, thawh khatna an kalpui chu April 27, 2022 khan zawh a ni.

District Jail tina Superintendent leh thawktu dangten, lâwm tak leh phur takin an lo dâwnsawn avangin Synod Prison Ministry chuan lawmthu an sawi. Rev Lalhmuchhuaka, Director, Synod Prison Ministry chuan, "Tun aia chak leh awmze nei leh zuala thawk turin, Synod Prison Ministry chuan Kohhran leh khawtlang, tlawmngai pawl leh Kohhran huang chhhunga Committee peng tin te, Kohhran mipui mimirin kan tih theih tam tak, a nachang kan hriat loh avanga kan tih lohte inhrilh hriat thar zel a. Tun aia Sawrkar kut ti chak leh zual túrin ruahmanna te siamin, kan phur hle a ni," tiin a sawi a. "Jail hi mi sualte nghaisakna leh hremna hmun ni lovin, Pathianin mihring min siam chhan ang takin; kan unau tuna tang mekte hi eng vang pawhin tang se la, taksa, rilru leh thlarau lam nunah siamthatna famkim an chan theihna turin an tan chhúng hian; an lo chhuah hunah leirem an raha, an chhungte tan leh an lawina kohhranah te, khawtlang leh ram tâna mi tangkai, mi dangte tâna inngah ngamna an nih theihna turin, Correctional Centre a nih ang taka Jail hi enkawla, buatsaih a nih theihna turin, vocational training mumal leh changtlung taka kalpui a nih theih nan, Synod Prison Ministry chuan Sawrkar kut tichaka, thawhpuitu nih hi a tum ber pakhat a nih thu a sawi bawk. Jail tang mekte pawhin, Synod Prison Ministry hi lâwm taka min thawhpui avangin kan lâwm tak zet a ni," tiin a sawi bawk.

I.G Prisons atanga phalna an hmuh angin, Central Jail, Tanhril leh District Jail, Armed Vengah chawlhkar tin ni hnih (2) ve ve, mimal thlarau lam nun luhchhuah zawnga rawngbawlina (Counselling) neiin, thla tin Pathianni vawikhatna leh vawihnihna-ah Pathian Biak inkhawm an neihpui a. Aizawl khawpui pawna lama District Jail-ah erawh chuan, thla tin Pathianni vawikhatna leh wawi thumna-ah Synod Prison Ministry, District Hruaitute ruahmannain inkhawm thin a ni bawk. Jail-a Pathian Biakna hmanrua tihchangtlun kawngah Synod Prison Ministry hian a thawh hlawk hle.

☐ **MSSU Secretarial Training neih a ni**

May 3, 2022 khan Presbyterian Kohhran Mizo Sunday School Union buatsaih '17th Biennial Secretarial Training' chu J.M. Lloyd Hall, Synod Office-ah neih a ni.

17th Biennial Seretarial Training hi nikum 2021 kha a neih hun tur tak chu a ni a. Nei tura ruahmanna tih fel nimahse hripui avangin neih theih a ni ta lo a. Hrileng a ziaawm takah chuan a hun pangngai angin nei thei lo mah ila, nikhat chauh tal Secretary mawhphurhna pawimawh zual in hrilh ni se, tiin rel a ni a, tluang taka neih a ni.

Training-ah hian Rev. V.L. Luaia Hranleh, Executive Secretary i/c MSSU-in hunserh a hman a, Pi Lalpianthangi Hrahseleh, MSSU Coordinator-in Inlawmna leh Inhmelhriattirna hun a hman a.

First Session-ah 'Secretary hna leh mawhphurhna' tih thupui hmangin Pu H.K. Hmingthanzuala, MSSU Asst. Coordinator-in thu a sawi a, Pu John Lalhrualtuanga, Archives Asst. Coordinator-in Practical a neihpui baw. Second Session-ah 'Sunday School inrelbawl dan leh Inkaihhraina' tih thupui hmangin Pu Lalhmunzauva Tlau, MSSU Asst. Coordinator-in thu a sawi leh a, Pu John Lalhrualtuanga, Archives Asst. Coordinator-in Assignment khaikhawmna a neihpui leh baw. Hemi hnu hian zawhna leh chhanna hun tha tak hman a ni.

Reflection and Farewell neih chhonzawm nghal a ni a, Rev. Z.D. Lalhmachhuana, Synod Secretary-in programme a kaihruai a, trainee aiawh thusawi ngaihthlak a nih hnuah Rev. Z.D. Lalhmachhuana'n thusawiin trainee-te Certificate a sem a, Pi Lalpianthangi Hrahseleh, MSSU Coordinator-in lawmthu sawina neiin training khar a ni.

Training-ah hian Synod hnuai MSSU zawmtu Pastor Bial tin Bial Sunday School ziaktu pakhat theuh tel tura tih an ni a, mi 153 an tel thei a ni.

□ **Women Centre-ah Mini Library hawn a ni**

May 2, 2022 (Thawhtanni) khan Mizoram Presbyterian Kohhran Hmeichhe enkawl, Women Centre Phunchawngah Mini Library siam thar chu Pi Sailuti, Inkhawmpui Lian Chairman in a hawng.

He Library hawnna Inkhawm tawite hi Pi Vanlalhrui, Vice Chairman in a kaihrui, Pi H. Lalfakmawii, Secretary-in Mini Library hawn a nih chhan leh hawn a nih dan te a sawifiah a. Women Centre-a zirlaiten kut themthiamna thil an zir bakah lehkha chhiar an lo uar deuh deuh theih nan te, tisa leh thlarau lama hma an sawn zel theih nan leh Pathian ropuina turin Pi Sailuti hian a hawng a, hemi rual hian Women Centre-a hman tur Fridge lian, 620 litre lai dawng chu Pathian hnenah a hlan baw.

Women Centre hi August 4, 2016 a din a ni a, tunah hian puanthui zirlai 35 leh thawktu 5 an awm. Batch tin ten an zir tan dawnah a hawnna hun hman a ni thin a. Centre-a an luh atanga hun remchhang hmasaberah Synod Revival Speaker-te sawmin Crusade neih thin a ni a, thawktute leh zirlaiten an hlawkpui hle thin. Centre an chhuahsan dawnah kharna programme hman thin niin Certificate pek thin an ni. Tunah hian puanthui Batch 7 kal tawhin mi 242 in puanthui an zir chhuak tawh a, Puantah Batch 5 kal tawhin mi 25 in an zir chhuak tawh baw. Women Centre-ah hian tui a harsat avangin lei chhunga tui verh chhuah pahnih (Submersible Water Pump) a awm a. Nitin tui litre 4,000 - 5,000 inkar vel pump chhuah theih a ni a. Hei hian Centre-a tui mamawhna a phuhruk tha hle a ni.

Women Centre ram, a hungna hrulah ke-a kalna tur (Footpath) siam mek a ni a. Hei hi Women Centre-a awm te inkhawm kawng atan leh Phunchawng mipuite tan tangkai tak tur a ni. Women Centre hi Mizoram Presbyterian Kohhran Hmeichhiate din leh enkawl a nih angin hmun hrang hrang tlawhtu an awm ve reng a, Covid-19 hripuiin a nuai lai pawhin hmun hrang hranga Kohhran Hmeichhiate leh mi tlawmngaiten chawhneh leh an mamawh te an pe thin a, Zoram leh hmun hrang hrang atangan englai pawhin tanngtai puina an dawng reng baw a, Kohhranhote chungah lawmthu an sawi a ni.

□ **Synod Mission Board leh ram pawn chet velna**

♦ **Headmaster thar Seminar** : May 4 - 6, 2022 chung hian Headmaster thar Seminar, Committee Room - 1, Synod Office-ah neih mek a ni. Seminar neihpui tura Headmaster kohte hi kum 2020, 2021 leh 2022 atanga Headmaster hna thawktu tura ruat tharte an ni a, mi 18 an ni.

Seminar-ah hian thupui pawimawh tak tak - School administration under SMB, School Account leh School Intodelh, Office Files and Correspondences, Headmaster mawhphurhna, School, Field leh SMB inlaichinna, School Record leh Document vawn chungchang te zirpui an ni a, sawihona hun hman thin a ni. Naktuk (May 6, 2022) tlai lamah Synod Mission Board Secretary Rev. R. Lalhmingsanga hovin inkawmhona hun an hman ang a, zanriah an kilho nghal ang.

♦ **Arunachal & Assam Mission Field (West)**

May 1, 2022 (Pathianni) khan Rahung Fellowship (Bomdila Bial)-ah ringthar puitling 2 Lal Isua zui turin an inpe. Anni rual hian ringtu fa naupang 2 Lal Isua zui turin an inpe baw.

♦ **Assam Mission Field**

May 1, 2022 (Pathianni) khan Satribari fellowship-ah mi pahnih (Nu leh a fa) Lal Isua zui turin an inpe a, Sivasagar fellowship-ah chungkaw khat a mi pali (Puitling 2 leh naupang 2) te Lal Isua zui turin an inpe baw.

♦ **Jharkhand Mission Field**

April 29, 2022 (Zirtawpni) khan Jhilimili Preaching Station-ah ringthar puitling 1 Lal Isua zui turin an inpe a, April 30, 2022 (Inrinni) khan Dhawater Preaching Station-ah ringthar pali (puitling 1, naupang 3) Lal Isua zui turin an inpe baw.

May 1, 2022 khan Dhaka Kohhranah mi 4 (Puitling 3 leh naupang 1) Lal Isua zui turin an inpe a, Balia Kohhranah ringthar puitling 3 Lal Isua zui turin an inpe a, Dhaka Kohhranah Believers Church atangin mi pali kan Kohhranah an lo pakai bawk.

♦ **Lucknow Mission Field**

May 1, 2022 (Pathianni) khan Lucknow East Pastor Bial, Chautra fellowship-ah mi 6 (Puitling-4, Naupang-2) Lal Isua zui turin an inpe.

♦ **Arunachal North**

May 1, 2022 (Pathianni) khan Aalo Biala Kaying Kohhran-ah ringthar 3 (puitling 1+2 naupang) Lal Isua zui turin an inpe.

♦ **Synod Mission Board Rinthar**

No.	Field	Jan - Apr., 2022	No.	Field	Jan - Apr., 2022
1.	Home Mission North	16	10.	Lucknow	47
2.	Barak Area	77	11.	Patna	48
3.	Tripura	412	12.	Nepal	43
4.	Home Mission South	96	13.	Arunachal & Assam West	33
5.	Delhi	111	14.	Assam	33
6.	Siliguri	220	15.	Jharkhand Mission	158
7.	Calcutta	488	16.	Arunachal & Assam North	8
8.	Karbi Anglong	49	17.	Odisha	108
9.	Arunachal & Assam East	26	18.	Masihi Sangati	3,585
				BELH KHAWM	5,558

□ **Kohhran Hmeichhia**

♦ May 3, 2022 khan Sakawrtuichhun Kohhranah Leadership Training neih a ni a, Central Kohhran Hmeichhe hruaitu - Pi Lalhmingliani, Finance Secretary leh Pi A. Nazi, Committee-ten training hi an neihpui a ni.

♦ May 7 & 8, 2022 hian Durtlang Leitan Bialah Leadership Training & Kristian Chhungkaw Campaign neih a ni dawn a, Central Kohhran Hmeichhe hruaitu - Pi Sailothangi, Pi Zothanpari leh Pi R. Lalrempuii (Committee Members) ten training hi an neihpui ang.

♦ May 5 - 8, 2022 chhung hian KTP General Conference, Kolasib-a tel turin Central Kohhran Hmeichhe hruaitu - Pi Sailuti, Chairman leh Pi Lalrotluangi Sailo, Committee Member-te an kal.

□ **PES**

May 5 & 6, 2022 hian Tuidam, Rengdil, Kawrthah leh Zawlnuam-a Presbyterian English School tlawh leh building thar hawnaa tel turin Pu P.C. Vanlalhruaia, Supervisor of Schools a kal.

□ **Hruaina Eng FM Radio :**

MAY 6, 2022 (Zirtawpni) (FM Zoawi - Aizawl & Lunglei @ 7:30 p.m.):

Solo : Angili Lalhmangaihzuai- Ka zai chhan Isua
 Zaipawl : Bungkawn Bial Zaipawl-Isua Zuiin
 Thusawi : Rev Vanlalzuata-KHAWVEL mamawh
 Solo : C.Lalmalsawma- Lalpa chu ka nunna
 Zaipawl : Bawngkawn Bial Zaipawl- Nunna thianghlim siamtu

□ **Moderator leh Executive Secretary-te Programme:**

Rev. Dr. Vanlalnghaka Ralte : Moderator

May 5 - 9, 2022 : KTP General Conference, Kolasib
 May 10, 2022 : Online Presentation (SATHRI Research Methodology)

Rev. C. Zoramawia : Senior Executive Secretary

May 1 - 8, 2022 chhungin zin programme a nei lova, office-ah a awm ang.

Rev. V.L. Luaia Hranleh : Executive Secretary

May 5, 2022 Hospital Board meeting
 May 6, 2022 Hmeichhe Hostel Interview & Hospital Building Committee
 May 7 - 8, 2022 KTP General Conference, Kolasib

Rev. Dr. K. Lallawmzuala : Executive Secretary

May 5 - 8, 2022 KTP General Conference, Kolasib